



册府元龟

卷之百三十六

至三十八



1	3
849	
48	



13
849
48



册府元龜

淮南李嗣京叅閱

西極文翔鳳訂正

豫章黃國琦較釋

帝王部 一百三十六

慰勞

周禮小行人之職國師役則犒之所以省郵罷勞激
勵壯武也詩云我姑酌彼金壘維以不永懷又以均
錫宴飲昭示慈惠也自小雅之作厥義彌著施及後
世斯可槩舉若乃遣帥徂征宿兵在野邊候方警戍

册府元龜 帝王部

卷之百三十六

乙

守斯久迨夫弔伐弭寧振旅凱入則必親迓戎輅巡省和門亦復臨遣將臣申諭恩旨是古者撫士慰下勞還勤歸之道也至於敦諭反側綏懷寇亂安輯降附案覆註累咸政之大者良可述焉

周文王爲西伯之時以殷王之命命將率遣戍役以守衛中國故歌采薇以遣之出車以勞還杖杜以勤歸又使臣以王事往來於其職於其來也陳其勤苦以歌樂之故作四牡詩

漢高祖初爲漢王二年十一月自廣武之間西入關至櫟陽存問父老置酒留四日復如軍

文帝六年匈奴大入邊以宗正劉禮爲將軍軍霸上祝茲侯徐厲爲將軍軍棘門以河內守周亞夫爲將軍軍細柳以備胡帝自勞軍

魏明帝景初二年司馬宣王爲太尉帥師討公孫文懿于遼東既平天子遣使者勞軍于薊

齊王正始二年司馬宣王破吳軍追至三州口斬獲萬餘人收其舟船軍資而還天子遣中嘗侍勞軍于宛

嘉平三年司馬宣王帥中軍至其城縛王凌以歸京師天子遣侍中常誕持節勞軍于五池

高貴鄉公甘露元年七月安西將軍鄧艾大破蜀大將姜維於上邽詔曰兵未極武醜虜摧破斬首獲生動以萬計自頃戰克無如此者今遣使者犒賜將士大會臨饗飲宴終日稱朕意焉

陳留王卽位使侍中衛瓘慰勞河北

晉武帝太康元年三月龍驤將軍王濬平吳詔遣使者犒濬軍又遣兼侍中張側黃門侍郎朱震分使楊越慰其初附

穆帝永和十年桓溫北伐進至霸上符健以五千人深溝自固居人皆安堵復業持牛酒迎溫於路者十人八九耆老感泣曰不圖今日復見官軍初溫恃麥熟取以爲軍資而健芟苗清野軍糧不屬收三千餘口而還帝使侍中黃門勞溫于襄陽

海西公太和四年桓溫北伐至枋頭爲慕容垂所敗溫甚耻之歸罪于袁真表廢爲庶人真怨溫誣已據壽陽以自固潛通符堅慕容暉帝遣侍中羅含以牛酒犒軍于山陽使會稽王昱會溫于涂中

簡文咸安二年詔曰吾承祖宗洪基而昧于政道懼不能允釐大工克隆先業夕惕惟憂若涉泉水賴宰輔志德道濟伊望群后竭誠協契斷金內外盡翼贊

之規文武致匪躬之節異因斯道終克弘濟每念干戈未戢公私疲悴藩鎮有疆理之務征戍懷東山之勤或白首戎陣忠勞未叙或行役彌久擔石靡儲何嘗不昧旦晨興夜分忘寢雖未能撫而巡之且欲達其此心可遣大使詣大司馬并問方伯逮于邊戍宜詔大饗求其所安又籌量賜給悉分周普

孝武大元八年謝玄謝琰桓伊等破苻堅詔衛將軍謝安勞旋師于金城

後魏孝文太和十七年十二月帝罷南伐巡省六
宣武正始三年四月詔遣使者巡慰北邊酋庶

永平元年鎮北將軍李坪討京兆王愉於冀州既平
宣武遣兼給事黃門侍郎秘書丞元梵宣旨慰勞

孝明孝昌元年徐州刺史元法僧叛入于梁梁遣其
豫章王蕭綜入據彭城時安豐王延明爲大都督大
行臺率臨淮王彧等衆軍討之既而蕭綜降附徐州
清復遣散騎常侍常景兼尚書持節馳與行臺都督
觀機部令時尚書令蕭寶寅都督崔延伯都督北海
王顥都督車騎將軍元嘗芝等並各出持詔詣軍宣
旨勞問

又撫軍將軍兼行臺尚書源子雍破賊大破蕭寶寅

佐單步胡提于曲沃堡帝璽書勞勉之子雍在白水郡復破阿非軍于白水郡多所斬獲詔遣侍中尚書令城陽王徽於潼關宣旨慰勞
廢帝普泰初以李裔爲持節散騎嘗侍安北將軍兼給事黃門侍郎慰勞山東大帥
出帝永熙三年五月丁酉帝幸華林都亭集京城都督及軍士三千餘人慰勉之

後周太祖爲西魏相國大統八年十月北齊神武以衆攻玉璧城晉州刺史常孝寬拒之著戰六旬神武夜遁太祖嘉孝寬功令殿中尚書長孫紹遠左丞相

王悅至玉璧勞問授驃騎大將軍
武帝保定四年十月詔大冢宰護等伐齊丁卯幸沙苑勞師癸酉還宮
建德五年東伐十二月次於晉州初齊攻晉州恐王師卒至於城南穿壑自喬山屬於汾水煬帝帥諸軍八萬人置陣東西二十餘里帝乘嘗御馬從數人巡陣處分所至輒呼主帥姓名以慰勉之將士感見知之思各思自勵
隋煬帝以仁壽四年即位八月并州總管漢王諒反詔左僕射楊素并州道行營總管討平之帝遣素弟

脩武公約齋手詔勞素曰我有隋之御天下也于今二十有四年雖復外夷侵叛而內難不作脩文偃武四海晏然朕以天不銜恤在疚號天叩地無所逮及朕本以藩王謬膺儲副復以庸虛纂承鴻業然天下者先皇之天下所以戰戰兢兢弗敢失墜况復神器之重生民之大哉賊諒包藏禍心自幼而長羊質虎皮假託名譽不奉國諱先圖叛逆違君父之命成莫大之罪誑惑良善委任姦回稱兵內侮毒流百姓私假署置擅相謀戮小加大少凌長民怨神怒衆叛親離爲禍不同同歸於亂朕寡兄弟猶未忍言是故開

關門而待寇戢干戈而不發朕聞之天生蒸民爲之置君仰惟先旨每以子民爲念朕豈得枕伏苫廬顛而不救也大義滅親春秋高義周且以誅二叔漢啓乃戮七藩義在茲乎事不獲已是以授公戎律問罪大原且逆子賊臣何代不有豈意今者近出家國所歎荼毒甫爾便及此事緣朕不能和兄弟不能安蒼生德澤未弘兵戈先動賊亂者止一人塗炭者乃衆庶非唯寅畏天威亦乃孤負付屬薄德厚耻愧乎天下公乃先朝功臣勲庸克茂至如皇基草創百物惟始便匹馬歸朝誠識兼至汴部鄭州風捲秋蕓荆南

塞北若火燎原早建殊勲夙著誠節及獻替朝端具
瞻惟允爰弼朕躬以濟時難昔周勃霍光何以加也
賊乃竊據蒲州關梁斷絕公以少擊衆指期平殄高
壁據嶮抗拒官軍公以深謀出其不意霧廓雲除水
消瓦解長驅北邁直趣巢窟晉陽之南蟻徒數萬諒
不量力猶欲舉斧公以稜威外討發憤於內忘身殉
義親當矢石兵刃暨加魚潰烏散僵屍蔽野積甲若
山諒遂守窮城以拒鈇鉞公董率驍勇四面攻圍使
其欲戰不敢求走無路智力俱盡面縛軍門斬將塞
旗伐叛柔服元惡旣除東夏清晏嘉庸茂績於是乎

在昔武安平趙淮陰空齊豈若公遠而不勞速而克
捷者也朕殷憂諒闇不得親御六軍未能問道於上
庠遂使劬勞於行陣言念於此無忘寢食公乃建累
世之元勲執一心之確志古人有言曰疾風知勁草
世亂有誠臣公得之矣方乃銘之嘗鼎豈止書勲竹
帛哉功之克諧哽歎無已稍令公如宜軍旅務殷殊
當勞慮故遣公弟指宣往懷迷塞不次
素上表陳言曰臣自惟虛
薄志不及表州郡之下敢憚劬勞卿相之榮無階覬
望然時逢昌運王業維始涓流赴海誠心屢竭輕塵
集嶽功大人微徒以南陽里閭凡沛子弟高位重爵
榮顯一時遂復入處端赴愬戎侍受文武之任預帷
幄之謀豈曰才能實繇恩澤欲報之德義極昊天伏
惟陛下紹重日之明養繼天之德收臣於踈遠招臣

以光輝南服入就道之書春宮奉肅成之旨然草木無心尚榮枯候時况臣有心寔自効無路晝夜迴徨寢食怵惕嘗恐朝露奄至虛負聖慈賊諒包藏禍心有自來矣因幸國衰便肆凶逆與兵晋代搖蕩山東陛下拔臣於日流授臣以戎律蒙心腹之寄稟平亂之規蕭王赤心人皆為死漢皇大度天下爭歸妖寇廓清豈臣之力曲蒙使臣弟約齋詔書問勞高旨峻筆有若天臨洪恩大澤同于海運雖百殞無以自酬

長樂宮

武德元年十月遣右武侯大將軍龐玉率師西討帝幸開遠門勞將士而還

十一月秦王征薛仁果凱旋帝享勞旋師

三年四月秦王平并州帝遣司農卿韋雲起勞軍

四年三月益州道行營僕射竇軌率兵擊東都帝引其將較五百人宴賜而遣之

四月皇太子討張長遜迴班師帝於玄武門宴勞將士賜帛各有差

五月王世充降遣尚書右僕射裴寂持節勞軍又遣侍中陳叔達齎百牢上罇酒醺勞秦王於近郊

五年十二月皇太子建成與劉黑闥戰於魏州城下破之黑闥抽軍北遁詔尚書右僕射裴寂馳往勞之

六年十月秦王屯并州以備突厥及班師帝迎勞於忘武頓

王齒龍突騎帝大悅璽書勞之曰知破焉耆虜其僞
王功立威行深副所委但焉耆絕域地阻天山恃遠
憑深敢懷叛逆卿望崇位重報效情深遠涉沙場躬
行罰罪取其堅壁曾不崇朝再廓遊魂遂無遺寇緬
思竭力必大艱辛超險成功深足嘉尚

十九年帝征遼二月李勣所領之衆頓於幽州詔遣
通事舍人盧師讓齎璽書詣軍中勞勉之將士咸悅
二十年六月平薛延陀詔曰朕聞獯獫強暴歷代憑
凌結晦關都凝氣大漠家山宅野時獸聚而禽分幕

毳廬種乍蝨屯而集塞退因利飽進爲財饑前王弊
其貪殘中夏憚其薦食然而三策知慮非爲禦寇之
方千里長城豈謂靜邊之計故以百王靡服千古不
賓種落實繁姦革孔熾武德之際飲馬渭濱貞觀之
初敢恣凌逼朕載懷慷慨命將出師旗鼓一臨沙漠
大定雪涇陽之周耻報白登之漢讐截瀚海以開池
籠天山而築苑其餘醜類自巳羈縻勞我邊旰軫余
遐念將奮鈇鉞受命上玄延陀惡積禍盈今日夷滅
醜徒內潰凶黨外離契苾迭款來降其餘相率歸附
唯僕骨同羅猶懷假息冰消電碎匪夕伊朝豈朕威

思所懷故乃蒼旻之惠觀賊此勢何能自全今不乘
機恐貽後悔故欲暫往靈州親自招撫安邊靜亂下
固昨基一軌同文永弘家業使萬里之外不有半烽
百郡之中猶無一戍永絕鎮防之役豈非黎元樂見
雖復去歲東征士馬倦勞甫施京邑曾未踰年今秋
復行理多疲頓但以良藥苦口非病者甘之而人必
焉思去膏肓之疾私種斃力豈農夫樂焉而必履之
求其倉庫之益斯皆忍小惡而成大美就輕害而得
殊功朕積疾累時今尚虛憊必欲牽病就路以赴天
機百辟士庶幸勿辭也遼東從兵皆不差發布告天

下悉朕意焉

二十二年三月庚戌遣通事舍人常燁往使歸兵道
行軍宣慰士衆是年右武侯將軍梁建方擊松外蠻
破之其帥盛遂稽六請降遣首領十人來謁軍門建
方振旅而還及至帝勞其勤苦賜以上駟

高宗永徽四年十月以睦州女子陳碩真率衆反楊
州長史房仁裕平之詔刑部尚書唐臨馳傳案覆被
誣誤者悉免之人吏爲賊所殺者官爲殯斂

龍朔元年遼東道行軍總管蘇定方拔百濟之貞都
城其王義慈來降遣左衛郎將王文庶齎璽書慰勞

定方已下將士及百濟百姓各令安堵如舊有才者節級錄用若能便經畧高麗者委定方揀擇將士可否聞奏

玄宗開元三年三月遣兵部員外郎王上客刑部員外郎楊欽明等分往諸軍宣慰將士

四年十二月命衛尉少卿李嵩齋璽書慰勞朔方降戶

九年九月詔曰如聞鹽夏兩州百姓及六州胡等被胡賊殺掠宜令御史韓朝宗皇甫翼齋書分往慰問便復損數其被損之家務令存恤應須給貸蠲免量

事處置訖迴日奏聞

十二年七月以黔州道招討使內侍楊思勗討溪州賊帥有功特加輔國大將軍兼內侍祿俸防閣一事已上並依品級宴思勗以下立功將士於朝堂謂曰蠻夷不道賊害平人卿等竭誠一舉而定窮深盡險罔不率從往返若飛當甚勞弊各賜卿少物宴畢領取

十五年涼州都督王君奭破吐蕃凱旋詔置酒朝堂宴之及將士等並賜物有差帝謂君奭及將士等曰吐蕃小醜敢懷逆命趣窺亭鄣以逞凶狂卿等智勇

風彰軍威克振總整旗鼓屢翦渠魁深入寇庭當甚勞耳

十六年二月乙未令朔方節度副大使左金吾大將軍信安郡王禘宣慰嶺南

二十六年十月壬申命侍御史陳繇使于劔南安戎城宣慰將士勅曰吐蕃醜類背約孤恩卿等同嫉寇讐爲國展效深入賊境久冒難危至於勤勞豈不知委項聞在彼小有喪敗卿等非不盡力自是主將無謀古之用兵在於責帥王昱繇此亦已貶官卿等但須悉心不可因茲阻氣遞相激勵以保功名戰下之

人浮可憫惜並申弔祭用慰幽魂其病醫及陣下之家宜委陳繇與州縣相知優恤

天寶十四年十一月命榮王琬爲元帥東征安祿山帝御勤政樓宴將士

肅宗至德元年十月皇弟穎王璩陳王珪自蜀至上皇有詔慰問朝臣及將士等

代宗寶應元年冬以初平河朔拜宗正少卿李潛左庶子兼御史中丞河北宣慰使

廣德二年正月以尚書右丞顏真卿爲刑部尚書兼御史大夫充朔方宣慰使

永泰元年七月遣尚書左丞李涵以本官兼御史大夫于河北道宣慰

大曆二年九月詔曰河朔一隅地方千里外捍夷狄內輔成周撫勤王之師脩任土之貢顧其方鎮可謂崇重眷我侯伯實有勲勞且將相朕之股肱兆庶君之支體事同休戚寧忘鑿寢思撫巡而未獲念征鎮而未懷爰命宗臣往申旨諭銀青光祿大夫行尚書左丞襄武縣開國公李涵朕之茂親腹心攸寄純固所以致命文質所以經邦溫恭禮讓誠信易直勵匪躬之節秉憂國之心美其公才當所委任再令宣撫

皆合事宜既述慷慨之詞兼陳理化之績慰我憂念意甚嘉之今秋冬在候徃戍勸止將較有介冑之勞黎元有稅賦之役代予親問詔爾使臣仍兼副相之勞式重登車之務可兼御史大夫充河北宣慰使三年六月命兵部侍郎李涵兼御史大夫充河北道宣慰使以幽州之難故也

六年八月命左散騎嘗侍孟暉使河北道宣慰八年八月辛未幽州盧龍節度觀察等使簡較左散騎嘗侍幽州大都督府長史朱泚遣弟滔領防秋兵馬五千騎至自幽州詔發六軍將士千餘騎送於國

門許便道繇皇城南面出開遠門赴涇州行營命有司大置酒于開遠門宴慰遣之騎卒精銳冠絕諸軍道路觀者如堵

十年正月命內侍孫知古使于魏州宣慰因曉示田承嗣各守封疆

德宗建中四年三月遣太子太師顏真卿宣慰淮寧節度李希烈

十二月帝在奉天加給事中孔巢父兼御史大夫淄青宣慰使以潼關防禦鎮國軍使華州刺史董晉爲國子祭酒兼御史大夫河北宣慰使

興元元年正月帝在奉天以兵部員外郎李克兼御史中丞鎮興宣慰使

四月帝在梁州以屯田郎中沈房爲太嘗少卿兼御史中丞諸蕃計會及安西北庭宣慰使
六月乙巳詔曰朕獲承先顧付以大器懼德不類躬列聖羞度恭惕厲罔敢暇逸將期布令齊一致俗和平然而誠信未孚衆心遂阻理化乖當百度失中君臣之間鬱堙不達致寇雖深於罪已興戎尚昧于省躬思靖亂以濟人反勞師而贖武行者被殺傷之苦居者重齋送之勤四海騷然靡有寧處京邑之下轉

軸亦空環列之中徵發靡息畧內以勤遠居安而忘
 危賊臣誘姦乘間竊發豺狼穢于宮闕士庶陷于塗
 炭作威肆毒仇視我人萬姓嗷嗷呼天無告有隕路
 以抗節有脅從以假命且一夫不獲辜實在予况君
 臨萬邦作人父母既不克以覆育又從而咎之其心
 愧耻一食三歎出舍內省介于梁岷庶乎有瘳以荅
 譴戒皇天悔禍社稷降靈腹心爪牙奮謀宣力元惡
 稔慝脫身遁逃餘孽拒威所向摧殄掃氛沴而闢閭
 闔翦鯨鯢以清郊原函夏載寧室家相慶非我將相
 夾輔王室卿士交脩予遠軍旅協心畢命盡敵豈伊

寡昧克復興運戡定大難念之感懷宜令吏部侍郎
 班宏克宣慰使勞問將士撫諭蒸黎必躬必親如朕
 臨蒞朕整飭法駕即日還京策勲行賞大報忠烈銘
 功百代與國同休然後請罪祖宗不敢自蔽宣布中
 外明朕意焉

七月命給事中兼御史大夫孔巢父宣慰于河東諸
 軍

貞元元年六月以兵部侍郎李紆宣慰于河東諸軍
 中書舍人齊映宣慰于朔方河中同絳陝虢等州諸
 軍兵部尚書崔漢衡宣慰于幽州

二年四月淮西李希烈平命尚書左丞鄭叔則往淮
西宣慰詔曰自希烈叛命于今五年王澤不通下情
亦沮所宜宣我信命以釋危疑敷我惠和以慰傷瘵
滌清汙俗咸與惟新底綏一方以稱朕意

十六年七月以徐州張建封卒其子悛為將較所迫
俾領軍務詔擇臨難不攝者即其軍以諭之遂命吏
部員外郎李鄘為宣慰使

憲宗元和元年正月庚午詔萬年縣令薛彤赴彰義
軍宣慰

二年八月戊寅命給事中房式充幽州成德義武等
軍宣慰使時三節度劉濟王士貞張茂昭各持宿嫌
交惡聞於朝故有是命

四年八月命京兆少尹裴武宣慰於鎮州

十二月以太府卿鄧泳為東道行營諸軍宣慰使左
武衛大將軍田景度為北道行營諸軍宣慰使

十年正月丙戌以左羽林軍李文通為左金吾衛將
軍兼御史中丞充壽州宣慰使

十一年五月丁亥易定節度使渾鎬以累敗承宗之
衆上聞即日命使宣勞

六月庚子命給事中柳公綽宣慰于淄青右補闕張

冊府元龜 慰勞 卷之百三十六
宿爲判官

八月命尚書右丞許孟容宣慰汴宋陳許河陽行營諸軍

十一月己巳命比部員外郎張宿宣慰隨唐等州軍
十三年正月庚寅命諫議大夫張宿往淄青宣慰李師道以起居舍人唐敬休爲副宿至東都暴卒命左嘗侍李遜宣慰于淄青仍依前以唐敬休副之

十四年二月壬戌魏博田弘正奏淄青兗鄆十二州平詔戶部侍郎楊於陵以本官兼御史大夫充淄青宣撫使

六月癸酉制曰周禮政官之屬掌導王志以巡天下之邦國六郡統臨二庭縣邈居必申儆動當懾懷自頃東夏有虞近郊多壘沙朔之外剪爲寇戎亭障烽櫓之嚴遐張塞下使譯道途之要遠屬湟中今妖氛甫清師旅方息思欲肅關隴之右地制昆夷於盛秋而慮師無見糧卒有虛籍乏守禦之全備積愁歎之餘音臨軒永懷宜俾宣導非夫忠良練達文武兼資信厚足以得人心恪恭足以奉王事則何以膺茲選任布我憂勞至於間戍役之勤詳山澤之要稽軍實之名數計餽餉之盈虛宿弊有未除衆情有未達兵

機虜態一以上聞與在此行所至循拊宜令左金吾衛大將軍兼御史大夫胡証充京西京北巡邊使所經過州鎮與節度防禦使刺史審量利害具事實聞奏因程异之請也

穆宗以元和十五年正月即位二月命監察御史楊虞卿盧周仁高銖路群分徃京西京北監賞設將士十月成德軍節度王承宗卒弟承元密獻忠款命起居舍人栢耆徃鎮州宣慰

十一月命諫議大夫鄭覃徃鎮州宣慰以起居舍人王璠副之

長慶元年正月丁巳以京兆府司錄參軍溫造爲大原鎮州等道宣慰使以王承元請入朝也

二月辛未命給事中常弘景爲容州邕州安南宣慰使監察御史杜周士副焉

九月辛亥遣太子中允兼侍御使李察徃幽州宣慰二年正月命太子中允李察宣慰深州及魏博行營以鎮州兵亂殺節度使田弘正而牛元翼不從亂固守深州也

二月詔雪鎮州王廷湊仍令兵部侍郎韓愈充宣慰使又命戶部郎中崔護宣慰于昭義軍時劉悟爲昭

義節度監軍劉承偕頗恃恩權嘗對衆辱悟又縱其下以亂法悟不能平異日有中使至承偕宴之請悟悟欲往左右皆曰往則必爲其困辱矣軍衆因亂悟不止之遂擒承偕至牙門殺其二僉欲并害承偕悟救之獲免故有慰撫之命

七月甲寅命司勳郎中崔護均王府長史李彥璋分往昭義魏博兩道宣慰又以汴州李齊叛命光祿少卿李寮宣撫汴州

文宗太和元年十一月天平橫海等軍節度使烏重裔奉命吳守志宣慰鄆州仍領繒帛五萬疋就賜軍士以鄆帥新歿撫而安之也

二年二月辛亥命司封郎中王彥魏博宣慰

五月命左散騎嘗侍馮宿往河南道行營宣慰以滄州李回捷拒命而諸軍進討也

七月命諫議大夫柏耆往昭義宣慰

十二月又命柏耆往魏博宣慰仍與河陽滑州計會發軍便以兩處兵勢曉喻魏博將士令知赴救之師四面皆至

三年正月命鴻臚卿張賈往昭義魏博宣慰

三月命諫議大夫柏耆往德州城下宣慰

五月命給事中崔瑄往幽州宣慰中書舍人常詢往
德州宣慰

四年正月勅諫議大夫崔戎宜充劔南西川宣撫使
以南蠻入寇也

二月興元三軍作亂節度使李絳及家並被廢置訖
命給事中崔瑄充山西道宣慰使戶部員外郎嚴審
爲副又命中使先義逸赴興元宣慰

武宗會昌三年七月以御史中丞李回使幽鎮魏三
道時中書奏云秋氣已至將議進軍幽州須早出可
汗鎮魏須速平劉楨各要遣使諭旨兼探三鎮軍情

今日延英面奉聖旨欲遣張賈充使臣等商量張賈
幹濟有才甚諳軍中體勢然性氣稍直慮不安帖恐
不如且輟李回充使若以臺綱不可暫闕卽兵部侍
郎鄭淮久充戎鎮判事精敏雖無詞辨言亦分明官
重事閑最似相稱帝乃以李回使焉

昭宗乾寧二年十二月以前大理卿李焄爲黔中宣
慰使制曰將我詔命使于四方必惟其人矧乃舊服
咨于輔相僉曰汝諧用之不疑行矣思濟李焄國朝
名相之令嗣也文行器業雅有家風政事規爲克紹
先志踐履函便於中外練達深得其本根頃鎮黔江

治聞善政四年問俗五郡懷仁恩信被於昆夷盛名
振於縣道尋移旌蓋往理桂林載揚休聲屢著嘉績
兩地遺愛萬人去思今聞黔巫易帥之時頗失睦隣
之道慮成間隙又動干戈念遠俗之無辜何中霄而
不寐昇爾揆路爲吾使星尚念漢地人情必懷龔遂
河內風俗未忘寇恂宜其宣我憂勤導予霄旰強者
抑之弱者撫之無俾黔人又墮塗炭用爾專達膺予
簡求佇其嚮風聞爾稱職殊恩好爵無所恡焉
後唐莊宗同光四年二月丁巳遣宣徽使宋唐玉往
鄴都宣諭諸軍

明宗天成二年四月有內臣自荆南至云暑雨方寒
兵士苦之及劉訓有疾是日差孔循徑往勞問及續
賜孔循詔曰朕以荆門伐叛方委勳臣而聞統帥縈
切戎機勤劬王事致乖攝理深軫寤懷輟卿樞近之
繁達我優隆之旨固於旬朔已就宣和苟或尚未全
平且要暫還本道便於將息亦可允俞委卿精白凡
事詳酌審於準節庶協籌謀料度攻收撫綏軍旅咸
繫明畧更集殊庸倚注之心再三在念

九月戊午北面屯戍上言經夏戰馬多死是日出內
鹿馬三百匹賜之帝猶慮邊將憂慮召來人慰諭之

日盛夏酷熱人尚多疾其况馬邪但令勉於王事無
以此爲恐仍以槍劔賜其主將又日沿路芻粟館驛
相接爾慎勿擾人

三年六月命閤門使馮知兆往定州犒宴將較

末帝清泰元年十二月壬申遣李讓勳馳騎代北犒
享防邊將士

三年八月詔端明殿學士呂琦往河東代諸屯戍犒
軍

晉少帝天福九年三月契丹寇河北帝親征駐蹕澶
淵丙午先鋒指揮使石公霸遇賊數萬騎於戚城之

北爲賊所圍高行周符彥卿在戚城之東南方息於
林下忽聞賊至駭愕督軍而進纔數千騎衆寡不較
行周遣人馳告景延廣請益師延廣遲留候帝進止
旣而行周等爲賊圍之數重三人大譟瞋目奮擊賊
衆傷死者甚衆帝自御親兵援之前軍獲免帝登戚
城南古臺置酒以勞二將

漢高祖天福十二年十月討杜重威于魏府二十日
帝乘馬環城幸副部署慕容彥超尚洪千聶章周殷
等營遍加撫諭衆心咸懌

十一月將伐鄴壬午車駕次長垣因賜宰臣竇貞固

蘇逢吉蘇禹珪李濤及從官食帝曰朕少親戎馬險阻艱難備嘗之矣公等儒臣也從朕蒙犯霜露得無勞苦乎群臣蹈舞稱謝

周太祖廣順二年五月親征兗州至兗州城下於西屯寨下慰勞兵士賜監押使臣將較茶酒

十一月荆南上言覘知湖南事宜朗州大將劉言十月三日以兵入長沙界十五日至潭州其淮南所署僞節度使邊鎬焚城而遁岳州僞刺史宋權亦棄城去帝遣供奉官齊藏琦乘駟往湘潭慰撫三軍將吏三年九月涇州節度使史懿疾復作遣客省使楊廷

章往知州事賜襲木金帶縑帛詔諭彰義軍民吏曰朕以史懿自鎮邊蕃克勤王事眷言勲舊深副倚毗爰自近年多嬰疾苦邇來頻有發動乞赴闕尋醫既覽奏陳須議俞允已差客省使楊廷章往彼知軍州事即令史懿發來京師朕念涇州久夾瘡痍之地軍人百姓撫愛皆同今已指揮揚廷章候到日凡事倍加撫安不得輒有科率俾令衆庶皆遂蘇舒世宗顯德元年五月親征河東丁丑觀兵於城下帝巡撫諸軍親自慰免賜賚有差

五年四月丁丑吳越王錢俶上言四月十日夜杭州

火泚燒府署殆盡帝憫之遽命內臣齋重書恤問

冊府元龜

冊府元龜 卷之三百三十一 慰勞 火泚燒府署殆盡帝憫之遽命內臣齋重書恤問

冊府元龜

淮南李嗣京參聞

西極文翔鳳訂正

豫章黃國琦較釋

帝王部 一百三十七

旌表第一

上者甄明高義顯異至行所以激揚風化敦率人倫也蓋天下至大士民至衆不可家喻而戶曉故顯其忠所以勵事君也褒其孝所以勸事親也尊賢者所以尊善也表烈士所以興義也或授之爵秩或祿其

子孫或旌其門閭或賜以穀帛以至復其征賦申以
祠祀皆因事以立教獎一而勸百故能述宣王度不
變薄俗民德歸厚有耻且格蓋上之行化速於置郵
下之從風易如偃草繇斯道矣

周武王既克商釋箕子之囚封比干之墓表商容之

閭帝王

惠王二十一年齊會諸侯伐楚許穆公卒於師葬之

以侯禮凡諸侯薨于朝會加一等死

漢高帝五年既平項羽齊王田橫迺與其客二人乘

傳詣維陽至尸鄉自剄令二客奉其頭馳奏之高帝

曰嗟乎有以起布衣兄弟三人更王臣欽若等曰三

豈非賢哉為之流涕而拜其二客為都尉發卒二千

以王者禮葬橫

十二年十二月詔曰秦皇帝楚隱王陳魏安釐王昭

之齊愍王宣王趙悼襄王孝威王皆絕亡後其與秦

始皇帝守塚二十家楚魏齊各十家趙及魏公子無

忌各五家無忌即信陵君也令視其冢復無與他事初帝微

少時數聞魏公子無忌賢及即天子位每過大梁嘗

祠公子至是擊黥布還為公子置守冢五家世世歲

以四時奉祠公子

成帝時為霍光置守冢百家吏卒奉祠焉

平帝元始二年詔曰漢興以來股肱在位身行儉約

輕財重義未有若公孫弘者也位在宰相封侯而為

布祓脫粟之餼奉祿以給故人賓客無有所餘可謂

減于制度禮貴有嘗尊衣服有品而率下篤俗者也與內富厚

而外為詭服以釣虛譽者殊科夫表德章義所以率

世勵俗聖王之制也其賜弘後子孫之次見為適者

爵關內侯食邑三百戶

後漢光武時來歙攻公孫述為刺客所中自書表訖

投筆抽刀而絕帝聞大驚省書覽涕乃賜策曰中郎

將來歙攻戰連年平定羗隴憂國忘家忠孝彰著遭

命遇害嗚呼哀哉使大中大夫贈歙中郎將征羗侯

印綬謚曰節侯謁者護喪事還雒陽乘輿編素臨弔

送葬以歙有平羗隴之功故改汝南之當鄉縣為征

羗國焉

嘗少張隆初事公孫述少隆皆勸述降述不從並以

憂死及述既滅帝下詔贈少為太嘗隆為光祿勳以

禮改葬之其忠節志義之士並蒙旌顯

劉茂太原人為郡門下掾建武二年赤眉二十餘萬

衆攻郡縣殺長吏及府掾史茂負太守孫福踰牆藏

册府元龜 帝王部

空穴中得免其暮俱奔孟縣晝則逃隱夜求糧食積百餘日賊去乃得歸府明年詔書求天下義士福言茂曰臣前為赤舛所攻吏民懷亂奔走趣山臣為賊所圖命如絲髮賴茂負臣踰城出保孟縣茂與弟觸冒兵刃緣山負食臣及妻子得度死命節義尤高宜蒙表濯以勵義士詔書即徵茂拜議郎

譙玄巴郡閬中人也能說易春秋公孫述遣使者備禮徵之若不起便賜以毒藥玄受毒藥其子瑛泣血叩頭於太守奉錢十萬以贖父死述許之玄遂隱藏田野終述之世建武十一年卒明年天下平定玄弟

慶以狀詣闕白陳帝美之策詔本郡祠以中宰勅所
在還玄家錢

李業廣漢梓潼人也公孫述聞業賢徵之業固疾不起述羞不致之乃使大鴻臚尹融持毒酒劫業業遂飲毒而死蜀平帝詔曰表其閭蓋部載其高節圖畫形像

溫序為護羌校尉隗囂別將苟宇所拘伏劍而死王簿韓遵從事王忠特其屍歸歛帝聞而憐之命忠送喪歸雒陽賜城傍為冢地賜穀千斛縑五百疋除三子為郎中

李善清陽人本同縣李元蒼頭也元死唯孤兒續始
生數旬貨財千萬諸奴婢欲殺續而分其財善不能
制乃負續逃亡瑕丘界中十餘歲與歸本縣脩理舊
業時鍾離意為瑕丘令上書薦善行狀帝詔拜善及
續並為太子舍人

明帝永平二年十一月遣使者以中牢祠蕭何霍光
帝謁陵園過式其墓

姜詩廣漢人事母至孝母好飲江水嗜魚膾夫婦方
作供膳舍側忽有涌泉味如江水每旦輒出雙鯉嘗
以供母膳永平三年察孝廉帝詔曰大孝入朝凡諸

舉者一聽平之繇是皆拜郎中

章帝建初七年西巡狩幸長安以中牢祠蕭何霍光
元和二年東巡狩至沛使使祠故六安郡丞桓譚冢
鄉里以為榮

和帝永元二年十一月有事于十陵遣使者以中牢

祠蕭何曹參 蕭何墓見上註曹參墓在長陵旁道北

安帝永初二年劉雄為平原令劇賊平豪等入平原
界雄將吏士乘船追之至厭次河與賊合戰雄敗執
雄以矛刺之時小吏所輔前叩頭求哀願以身代雄
豪等縱雄而刺輔貫心洞背而死東郡太守捕得豪

等具以狀上詔書追傷之賜錢二十萬除父奉爲郎

中
元初中鮮卑數百餘騎寇漁陽太守張顯率吏士追
出塞遙望虜營煙火急趣之兵馬掾嚴授慮有伏兵
苦諫止不聽鮮賊入進授不獲已前戰伏兵發授身
被十創歿於陣顯拔刃追散兵不能制虜射中顯主
簿衛福功曹徐咸遽赴之顯遂墮馬福以身擁蔽虜
并殺之朝廷愍授等節詔書褒歎厚加賞賜各除子
一人爲郎中
延光三年幸長安以中牢祠蕭何曹參霍光

桓帝延熹三年武陵蠻寇江陵荊州刺史劉度謁者
馬睦南郡太守李肅並奔走肅主簿胡爽扣馬諫止
肅遂殺爽而走帝聞之徵肅棄市度睦減死一等復
爽門閭拜家一人爲郎中
王渙爲雒陽令以平正居身得寬猛之宜元興元年
病卒民思其德爲立祠安陽亭
延熹八年特詔密縣存故太傅卓茂廟雒陽留渙祠
焉

靈帝中平中陳寔子紀字元方遭父憂每哀至輒嘔
血絕氣雖衰服已除而積毀消瘠殆將滅性豫州刺

史嘉其至行表上尚書圖象百城以勵風俗

袁秘汝南汝陽人也為郡門下議生黃巾起秘從太

守趙謙擊之軍敗秘與功曹封觀主簿陳端門下督

范仲禮賊曹劉禕德主記史丁子嗣記室史張仲然

等七人拔刃突陣與戰並死謙以得免詔復秘等門

閭號曰七賢

獻帝初即位遣使弔祠故太傅陳蕃太將軍竇武又

贈射聲較尉沮儁為弘農太守旌死節也

王允為司徒為李傕郭汜所害後帝遷都於許思允

忠節使改殯葬之遣虎賁中郎將奉策弔祭賜東園

秘器贈以本官印綬送還本郡封其孫黑為安樂亭

侯食邑三百戶

元尚為兗州刺史袁術將僭號欲以尚為太尉尚拒

之建安初逃還為術所害其後尚喪與太傅馬日磾

喪俱至京師帝嘉尚忠烈為之咨嗟詔百官弔祭拜

子瑋郎中而日磾不與焉

魏太祖北征柳城過涿郡令告太守曰故北中郎將

盧植名著海內學為儒宗士之楷模國之禎幹也昔

武王入殷封商容之間鄭喪子產而仲尼隕涕孤到

此州嘉其餘風春秋之義賢者之後有異於人敬遣

冊府元龜 帝王部 卷之百三十七 七

丞椽脩墳墓并致薄醪以彰厥德植仕漢為尚書以
 老疾去官隱居上谷軍都山獻帝初平三年卒
 徽茲字公振陳留襄邑人也少有大節不應三公之
 辟太祖初至陳留茲曰平天下者必此人也太祖亦
 異之數詣茲議大事從討董卓戰於滎陽而卒太祖
 每涉郡境輒遣使祠焉
 應余為南陽郡功曹宛將侯音劫射太守東里袞余
 以身捍袞前被七創而死及征南將軍曹仁討平音
 表余行狀並脩祭輟太祖聞之嗟嘆良久下荊州復
 表門閭賜穀千斛

文帝行幸自譙過梁遣使以太牢祀漢太尉橋玄
 黃初初大理王朗與太尉鍾繇連名表上主簿趙郡
 張登昔為本縣主簿值黑山賊圍郡登與縣長王雋
 帥吏兵七十二人直往赴救與賊交戰吏兵散雋殆
 見害登手格二賊以全雋命又守長夏逸為督郵所
 枉登身受考掠理逸之罪義濟二君宜加顯異兼稱
 登在職勤勞詔曰登忠義彰著在職功勤名位雖卑
 直亮宜顯褒賸近任當得此吏今以登為太官令
明
祖初也魯表聞太祖以所急者多
未遑幾擢至是復表之乃有此命
 明帝青龍中東征乘輦入故豫州刺史賈逵祠詔曰

昨過項見賈逵碑像念之愴然古人有言患名之不立不患年之不長逵存有忠勲沒而見思可謂死而不朽者矣其布告天下以勸將來

齊王嘉平中吳將諸葛恪圍於合肥新城時城中遺士劉整及鄭像出城傳消息皆爲所執皆守節不圓爲其所害後母丘儉上言因下詔曰夫顯爵所以褒元功重賞所以寵烈士整像召募通使越陷重圍冒突白刃輕身守信不幸見獲抗節彌厲揚六軍之大勢安城守之懼心臨難不顧畢志傳命昔解楊執楚有隕無貳齊路中大夫以死成命方之整像所不能

加今追賜整像爵關中侯各除士名使子襲爵如部

曲將死事科

高貴鄉公甘露二年四月詔曰玄菟郡高顯縣吏民反叛長鄭熙爲賊所殺民王簡負擔熙喪晨夜星行遠致本州忠節可加其特拜簡爲忠義都尉以旌殊行

七月車駕東征屯項復入賈逵祠下詔曰逵沒有遺愛歷世見祠追聞風烈朕甚嘉之昔先帝東征亦幸於此親發德音褒揚逵美徘徊之心益有慨然夫禮賢之義或掃其墳墓或脩其門閭所以崇敬也其掃

除祠堂有穿漏者補治之

八月詔曰昔燕刺王謀反韓宜等諫而死漢朝顯登其子諸葛誕創造凶亂主簿宣隆部曲督秦絜秉節守義臨難固爭爲誕所殺所謂無比干之親而受其戮者其以隆絜子爲騎都尉加以贈賜光示遠近以旌忠義

三年六月丙子詔曰昔南陽郡山賊擾攘欲劫竄太守東里袞功曹應余獨身捍袞遂免於難余顛沛隕斃殺身濟君其下司徒署余孫倫吏使蒙仗節之報

晉武帝詔曰蜀將軍傅僉前在閬城身拒官軍致命不顧僉父彤復爲劉備戰亡天下之善一也豈繇彼此以爲異僉息著蔓後没入官免爲庶人

泰始四年以東海劉儉有至行拜爲郎中

五年詔諸葛亮孫京隨才署吏

李密字令伯犍爲人也父早亡母更適人密見養於祖母蜀平後帝徵爲太子洗馬密上疏曰臣生孩六月慈父見背行年四歲舅奪母志祖母劉愍臣孤弱躬見撫養臣無祖母無以至今日祖母無臣無以終餘年母孫二人更相爲命是以區區不敢廢遠臣今

年四十有四祖母劉今年九十有六是臣盡節於陛下之日長報養劉之日短也烏烏私情願乞終養臣之辛苦非徒蜀之人士及二州牧伯所見明知皇天后土實所共鑒願陛下矜愍愚誠聽臣微志庶劉僥倖保卒餘年臣生當隕首死當結草臣不勝犬馬怖懼之情帝覽表曰密不空有名也嘉其誠欵賜奴婢二人下郡縣供養其祖母

惠帝永康元年詔以光祿大夫劉頌誅賈謐督攝衆事有功追封梁鄒縣侯食邑千五百戶

索靖太安末爲游擊將軍領雍秦涼義兵與賊戰被

傷而卒追贈太嘗後贈司空追封安樂亭侯謚曰莊周處義興陽羨人也爲御史中丞征氐人齊萬年力戰而沒帝追贈平西將軍賜錢百萬塋地一頃京城地五十畝爲第又賜其家近園五頃詔曰處母年老加以遠人朕每愍念給其醫藥酒米賜以終年劉殷新興人也性至孝曾祖母王氏盛冬思董而不言食不飽者一旬矣殷時年九歲乃於澤中哭不絕聲者半月董爲生焉太傅楊駿輔政備禮聘殷殷以母老固辭駿於是表之優詔遂其高志聽終色養勅所在供其衣食蠲其徭賦賜帛二百疋穀五百斛

元帝爲左丞相承制以稽紹死節事重而贈禮未副
勲德表贈太尉祠以大牢及卽位賜謚曰忠穆復加
大牢之祀

虞悝長沙人也與弟望並有士操譙王承之討王敦
以悝爲長史望爲司馬督諸軍湘東太守鄭澹敦之
姊夫也不順承旨遣望討之望率一旅直入郡斬澹
以徇四境及魏父來攻望每先登力戰而死城破悝
復爲父所執將害之子弟對之號泣悝謂曰人生有
死闔門爲忠義鬼亦何恨哉及王敦平贈悝襄陽太
守望榮陽太守遣謁者至墓祭以少牢

許孜東陽吳寧人也惠帝元康中郡察孝廉不起巾
褐終身年八十餘卒于家邑人號其居爲孝順里咸
康中太守張虞上疏曰臣聞聖賢明訓存乎舉善褒
貶所興不遠千載謹案所領吳寧縣物故人許孜至
性孝友立節清峻與物恭讓言行不貳當其奉師則
在三之義盡及其喪親實古今之所難咸稱殊類致
感猛獸弭害雖臣不及見然備聞斯語竊謂蔡順董
黯無以過之孜沒積年其子尚在性行純慤今亦家
於墓側臣以爲孜之履操世所希逮宜標其令跡甄
其後嗣以疇旣往以獎方來春秋傳曰善善及其子

孫臣不達大體請量議疏奏詔旌表門閭蠲復子孫

下壺爲尚書令右將軍蘓峻稱兵壺苦戰死之二子
矜旰見父沒相隨赴賊同時見害矜子誕嗣咸康六
年成帝追思壺下詔曰壺立朝忠恪喪身兇寇所封
懸遠租秩薄少妻息不贍以爲慨然可給實日廩其
後盜發壺墓尸僵髮蒼白面如生兩手悉拳爪甲
穿達手背安帝詔給錢十萬以脩塋兆

虞潭母孫氏吳郡富春人吳大帝族孫女也永嘉末
潭爲南康太守值杜弼構逆率衆討之孫氏勉潭以
必死之義傾其資產以餽戰士潭遂克捷及蘇峻作
亂潭時守吳興又假節征峻孫氏戒之曰吾聞忠臣
出孝子之門汝當捨生取義勿以吾老爲累仍盡發
其家僮令隨潭助戰質其所服環珮以爲軍資于時
會稽內史王舒遣子允之爲督護孫氏又謂潭曰王
府君遣兒征汝何爲獨否潭卽以子楚爲督護與允
之合勢其憂國之誠如是拜爲武昌侯太夫人加金
章紫綬潭立養堂於家王導以下皆就拜謁咸和末
卒年九十五成帝遣使弔祭謚曰定夫人

張茂妻陸氏吳郡人也茂爲吳郡太守被沈充所害

陸氏傾家產率茂部曲爲先登以討之克敗陸詣闕
上書爲茂謝不尅之責詔曰茂夫妻忠誠舉門義烈
宜追贈茂太僕

穆宗升平中慕容恪侵逼山陵時冠軍將軍陳祐守
雒陽衆不過二千時有沈勁者少負志節自表求配
祐効力因以勁補冠軍長史令自募壯士得千餘人
以助祐擊賊頗以寡制衆而糧盡援絕祐懼不能保
全會賊寇許昌祐因以救許昌爲名與寧三年留勁
以五百人守城祐率衆而東會許昌已沒祐因奔崖
焉勁志欲効命欣獲死所尋爲恪所攻城陷被執神

氣自若恪竒而將宥之其中軍將軍慕容虔曰勁雖
竒士觀其志度終不爲人用今若赦之必爲後患遂
遇害恪還從容言於慕容暉曰前平廣固不能濟辟
間今定雒陽而殺沈勁實有愧於四海朝廷聞而嘉
之賜東陽太守子赤黔爲大長秋

毛寶爲征虜將軍豫州刺史州陵縣開國侯守邾城
石季龍遣將攻邾城城陷寶率左右突圍出赴江溺
死穆帝詔曰寶之傾敗宜在貶裁然蘇峻之難致力
王室今咎其過故不加贈祭之可也其後公卿言寶
有重勳加死王事不宜奪爵昇平三年乃下詔復本

封

孝武太元中功臣普被減削司空何充等止得六家
守冢以故司空興平伯陸玩有佐命之勳先陪陵而
塋繇是特置興平伯官屬以衛墓

又詔曰褒德顯仁哲王令典故左尉忠穆公

稽紹也

執

德高邈在否彌宣貞潔之風義著千載每念其事愴
然傷懷忠貞之裔蒸嘗宜遠所以大明至節崇獎名
教可訪其宗裔襲爵王祀

丁穆為順陽太守符堅兵至為其所執至長安稱疾
不仕偽朝堅又領國南寇穆與關中人士唱義謀襲

長安事泄遇害臨死作表以付其妻周其後周得至
京師詣關上之帝下詔曰故順陽太守貞定侯丁穆
力屈身陷而誠節彌固直亮壯勁義貫古烈其喪極
始反言尋傷悼可贈龍驤將軍雍州刺史購賜一依
周虓故事為置屋宅并給其妻衣食以終厥身
周虓為西夷較尉梓潼太守陷于符堅不屈節而
死其子興迎致其喪冠軍將軍謝玄親臨哭之因上
疏曰臣聞旌善表功崇義明節以振揚聲教垂美來
葉故西夷較尉梓潼太守周虓執心忠烈勵節冠庭
遂嬰禍荒裔痛冥泉壤臣每悲其志以為蘇武之賢

不復過也前宣告并州訪虓喪并索其家負荷數千始得來至卽以資送還其舊隴伏願聖朝追其忠心表其殊節使負霜之志不墜於地則榮慰存亡惠被幽顯矣帝詔曰虓厲志貞亮無愧古烈未及拔身奄隕厥命甄表義節國之典也贈龍驤將軍益州刺史賻錢二十萬布百疋又贍賜其家

謝琰隆安四年討孫恩兵敗琰帳下督張猛於後斫琰馬琰遂遇害後左里之捷宋高祖令擒猛送琰小子混混剝肝生食之詔以琰父子殞於君親忠孝萃於一門贈琰侍中司空謚曰忠肅二子肇峻肇歷驃

騎參軍峻以琰勲封建昌侯及沒於賊詔贈肇散騎嘗侍峻散騎侍郎

安帝義熙初檀憑之與桓玄將皇甫敷戰死賜兖州刺史詔曰夫旌善紀功有國之通典沒而不朽節義之篤行故兖州刺史檀憑之忠烈果毅亡身爲國旣義敦其情故臨危授命考諸往迹古人無以遠過近者之贈意猶恨焉可加贈散騎嘗侍本官如故旣隕身王事亦宜追論封賞可封曲阿縣公邑三千戶孫李高義熙中討盧循於番禺循走交州季高病卒贈龍驤將軍宋高祖爲南海太守念季高之功乃表

曰孫季高嶺南之勳已蒙褒贈臣更思惟盧循稔也播

惡一紀據有全城若令根本未拔投奔有所招合餘

燼猶能為虞懸師遠討方勤勩筭而季高汎海萬里

投命洪流波激電邁指日遊至遂奄定南海覆其巢

窟使循進退靡依輕舟遠遁曾不旬月妖凶殲殄蕩

滌之功實此為大往年所贈猶為未優愚謂宜更贈

一州即其本號庶令忠勳不湮勞臣增厲重贈交州

刺史將軍如故

何無忌義熙二年遷都督江荆二州進鎮南將軍征

盧循兵敗握節死之詔曰無忌秉哲履正忠亮明允

亡身殉國則契協英謨經綸屯昧則重氛載廓及敷

政方夏實播風惠妖寇搆亂侵擾邦畿投袂致討志

清王略而事出慮外臨危彌厲握節隕難誠貫古賢

朕用傷慟于厥懷其贈侍中司空本官如故謚曰忠

肅

毛璩為征西將軍督益梁秦寧涼五州軍事譙從之

亂璩遇害及璩弟瑾瑗子姪之在蜀者一時殄沒璩

子弘之嗣義熙中時延祖為始康太守上疏訟璩兄

弟於是詔曰故益州刺史璩西夷較尉瑾蜀太守瑗

勤王忠烈事垂慮外葬送日近益懷惻愴可皆贈先

冊府元龜 帝王部 卷之三百三十一 十七

所授官給錢三十萬布三百疋論璉討桓玄功追封歸鄉公千五百戶又以裕之斬玄功封夷道縣侯後魏道武平原贈李勰宣威將軍蘭陵太守勰恬靜好學有聲趙魏間至是已亡帝哀惜之故有是命王憲字顯則北海劇人祖猛符堅丞相父休河東太守憲幼孤隨伯父永在潁符丕稱尊號復以永爲丞相永爲慕容永所殺憲奔清河匿於民家皇始中輿駕次趙鄴之高邑憲乃歸誠帝見之曰此王猛孫也厚禮待之以爲本州中正領選曹事兼掌門下太武討赫連經庾岳墓宅愴然動容遂下詔爲立廟

令一州之民四時致祭岳先事道武爲將有謀略名冠軍中道武猜忌誅之

段進爲白道守將蠕蠕大檀入塞圍之力屈被執進抗聲大罵遂爲賊所殺帝愍之追贈安北將軍賜爵顯美侯謚曰莊

石文德中山蒲陰人也有行義真君初縣令黃宣在任喪亡宣單貧無募親文德祖父苗以家財殯葬持卹三年奉養宣妻二十餘載及亡又衰經歛附率禮無闕自苗逮文德刺史守令卒官者制服送之五世同居門庭雍睦又梁州上言天水白石縣人趙令安

孟蘭疆等四世同居行著州里詔並標榜門閭
獻文未嘗農北陝人王玄威立草廬於州城門外衰
服蔬粥哭踴無時刺史苟頽以事表聞詔令問狀云
先帝澤被蒼生玄威不勝悲慕戀心如此不知禮式
詔問玄威欲有所訴聽為表列玄威云聞諱悲號竊
謂臣子同例無所求謁及至百日乃自竭家財設四
百人齋至忌日又設百僧供至大除日詔送白紬袴
褶一具與玄威釋服下州令表異焉

孝文帝初都雒陽嘗幸北邙遂幸洪池命任城王澄
侍昇龍舟因賦詩以序懷帝曰朕昨夜夢一老公頭
鬢皓白正理冠服拜立路左朕恠而問之自云晉侍
中嵇紹故此奉迎神爽卑懼似有求焉澄對曰晉世
之亂嵇紹以身衛主殞命御側亦是晉之忠臣比干
遭紂兇虐忠諫剖心可謂殷之良士二人俱死於王
事墳塋並在於道周然陛下徙御瀍雒經殷墟而弔
比干至雒陽而遺嵇紹當是希恩而感夢帝曰朕何
德能幽感達士也然實思追禮先賢樹揚忠懿比干
嵇紹皆是古之誠烈而朕務濃比干禮略嵇紹情亦
有愧然既有此夢或如任城所言於是求其兆域遣
使弔祭焉

郭祚從帝出征及還正授黃門車駕幸長安行經渭橋過郭淮廟問祚曰是鄉祖宗所承也祚曰是臣七世伯祖帝曰先賢後哲頓在一門祚對曰昔臣先人以通儒英博惟事魏文微臣虛薄遭奉明聖自惟幸甚因勅以太牢祭淮廟令祚自撰祭文

宣武景明三年九月車駕幸鄴詔使者弔殷比干墓董吐渾東郡小黃縣人也吐渾養尼事親至孝三世同居閨門有禮景明中畿內大使王凝奏請標異詔從之

正始元年六月立周公旦夷齊廟於首陽山

李伯貴宣武時爲郡守有孝行居父喪哀戚過禮遂以毀卒帝嘉之賜渤海相

王續生滎陽京縣人也遭繼母憂居喪杖而後起及終禮制鬢髮盡落有司奏聞帝詔標旌門閭甄其徭役

劉侯仁豫州人也永平元年賊人白早生殺刺史司馬悅據城南叛悅息臚走投侯仁賊雖加購募又嚴其捶撻侯仁終無漏泄臚遂免禍事寧有司奏其操行議免府籍叙一小縣詔可

李謚延昌四年卒其年四門十學博士孔璠等四十

五人上書論其行業帝詔曰謚屢辭徵辟志守冲素
儒隱之操深可嘉美可遠傍惠康近准玄晏謚謚曰
貞靜處士并表其門閭以旌高節於是表其門曰文
德里曰孝義

高道悅爲太子中庶子太子詢以道悅數規諫殺之
高祖甚加悲惜謚曰貞侯至帝又追錄拜其子給事
中

秦榮先性至孝遭父母喪哀慕不已遂以毀卒邑里
化其孝行帝嘉之乃下詔曰孝爲政本德乃化先旣
表天經又明地義居喪致疚至感過人窮號不反迄

乎減性行標當世理鏡幽明此而不顯道將何述可

贈滄州刺史以旌厥異

晁清遼東人也祖暉濟州刺史潁川公清襲祖爵例
降爲伯爲柔城戍將梁武攻圍糧盡城陷清抗節不
屈爲賊所殺帝褒美贈樂陵太守謚曰忠

孝明正光二年太保崔光奏劉昺著業京城遺文在
茲篇籍之美頗足觀採如或愆豐當蒙數世之宥况
乃維祖逮孫相去未遠而令久淪皂隸不獲收異儒
學之士所爲竊嘆臣忝職史教曾以奏聞乞勅尚書
簡准所屬甄免雜役用廣聖朝旌善繼絕敦化厲俗

詔日昞德冠前世蔚爲儒宗太保啓陳深合勸善其
孫等三家特可聽免河西人以爲榮

高諒正光中爲驍騎將軍徐州行臺屬元法僧反叛
逼諒同之諒不許爲法僧所害時年四十一朝廷痛
惜之贈左將軍滄州刺史

馮景正光中爲蕭寶寅關西大行臺都令從寶寅征
討寶寅將舉兵景固諫不從寶寅敗後景還雒朝廷
先聞景有諫言故免之除奉車都尉

貞孝女宗者趙郡栢仁人趙郡太守李叔裔之女范
陽盧元禮之妻率性至孝聞於州里父卒號慟幾絕

者數四賴母崔氏慰免之得全三年之中形骸銷
非人扶不起及歸夫氏與母分隔便飲食日損涕泣不
絕日就羸篤盧氏令家人慰喻不解乃遣歸寧還家
乃復如故如此者八九焉後元禮卒李追亡撫存禮
無違者事姑以孝謹著母崔以神龜元年終於雒陽
凶問初到舉聲慟絕一宿乃蘇水漿不入口者六日
其姑慮其不濟親爲奔喪而氣力危殆自范陽向雒
八日方達攀襯號踊遂卒有司以狀聞詔曰孔子稱
毀不滅性蓋爲其廢養絕類也李旣非嫡子而孝不
勝哀雖乖俯就而志勵義遠若不加旌異則無以勸引

澆浮可追號曰貞孝女宗易其里為孝德里標李盧二門以傳風俗

王榮世陽平館陶人也為三城戍主方城縣子梁武攻圍力窮知不可全乃先焚府庫後殺妻妾及梁軍陷城與戍副鄧元興等俱以不屈被害帝下詔褒美忠節進世爵為伯贈齊州刺史元興開國子贈維州刺史

莊帝建義初以鄭仲明兄洪建李冲女壻仲明舅氏之親其弟與謀扶戴仲明之死也且有奉國之意乃遣封安平縣開國侯邑七百戶贈侍中車騎大將軍

儀同三司尚書左僕射雍州刺史

永安初彭城石縣人孫道登初為梁武將常休等所虜面縛臨邠巡遠村塢令其招降鄉曲道登厲聲唱呼但當努力賊所不能遂屠戮之

荊州被圍行臺宗靈恩遣使宗女等四人入城曉諭為賊將所獲執女等巡城令其改辭女等大言天軍垂至堅守莫降賊忿各割其腹然後斬首二州表其節義遂登等並賜五品郡五等子爵聽子弟承襲遺使詣所存弔祭

廢帝時刁思遵妻魯氏女也始笄為思遵所聘未踰

月而思遵亡其家矜其少寡許嫁已定魯聞之自誓
 父母不達其志遂經郡訴稱刁民恠護寡女不使歸
 寧魯乃與老姑徒步詣司徒府自告情狀普泰初有
 司聞奏帝詔曰貞夫節婦古今同尚可令本司依式
 標榜

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

一百三十八

旌表第二

西魏武帝永熙中以故殷州刺史鄭楷兄弟父子並
 死王事朝野傷歎特贈侍中都督冀定湘三州諸軍
 事驃騎大將軍儀同三司冀州刺史

倉跋榮陽京縣人也喪母水漿不入口五日吐血數

升居憂毀瘠見稱州里有司奏聞帝詔標門閭

楊弘鄉郡襄垣人也三歲喪父為叔所養母年九十

三弘年七十五哀毀過禮三年服畢恨不識父追服

斬衰食粥羸服誓終身命經十三年哀慕不改為郡

縣鄉閭三百餘人上狀稱美有司奏宜旌賞復其一

門樹其純孝詔別勅集書標楊弘至行又可假以散

員之名也

自弘以下十人史不載年月今附于本朝之末

郭文恭太原平遙人為太平縣今年踰七十父母喪

亡文恭孝慕罔極乃居祖父墓次晨夕拜跪跣足負

土培祖父二墓寒暑竭力積年不已見者莫不哀歎

尚書聞奏標其門閭

董雒生居父喪過禮詔遣秘書中散温紹伯奉璽書

慰之令自抑割以全孝道又詔其宗親使相喻獎勿

令有減性之譏

王崇字乾邕陽夏雍丘人也兄弟並以孝聞身勤稼

穡以養二親仕梁州鎮南府主簿母亡扶而後起鬢

髮墮落未及將葬權殯宅西崇廬於殯所晝夜哭泣

鳩鴿群至一小鳥素質黑眸形大如雀栖於崇廬朝

夕不去母喪始闋復下父憂哀毀過禮是年夏風雹

所經處禽獸暴死草木摧折至崇田畔風雹便止禾

麥十頃竟無損落及過崇地風雹如初咸稱至行所感崇雖除服仍居墓側於其室前生草一根莖葉甚茂人莫能識至冬中復有鳥巢崇屋乳養二十毛羽成長馴而不驚守令聞之親自臨視州以聞奏標其門閭

張昇滎陽人居父母喪鬢髮墜落水漿不入口吐血數升詔表門閭

王閭北海密人也數世同居有百口又太山劉業與四世同居魯郡蓋雋六世同居並其財產家門雍睦鄉里敬異有司申奏皆標門閭

張安祖河陽人也襲世爵山北侯時有元承貴曾爲河陽令家貧且赴尚書求選逢天寒甚凍死路側一子年幼停屍門巷棺斂無托安祖悲哭盡禮買木爲棺手自營作斂殯周給朝野嘉歎尚書聞奏標其門閭

馬八龍武邑武強人也輕財重義友人武遂縣尹靈哲在軍喪亡八龍聞卽奔赴負屍而歸以家財殯葬爲制總服撫其遺孤恩如所生州郡表列詔標門閭李凡博陵安平人也七世同居同財家有二十二房一百九十八口長幼濟濟風禮著聞至於作役卑幼

競進鄉里嘆美標其門閭

邵洪哲上谷沮陽人也縣令范道榮先自胸城歸款已除縣令道榮鄉人徐孔明妄經公府訟道榮非勲道榮坐除名羈旅孤貧不能自理洪哲不勝義憤遂代道榮詣京師明申曲直經歷寒暑不憚劬勞道榮卒得復雪又北鎮反亂道榮孤單無所歸附洪哲兄伯川復率鄉人來相迎接送達幽州道榮感其誠節訴省申聞詔下州郡標其里閭

後周太祖時荆可河東猗氏人喪母悲號擗踊絕而復蘇者數四廬於墓側負土成墳鄉人以可孝行之至足以勸勵風俗乃上言焉帝令州縣表異之

竇榮定文帝欲以爲三公榮定上書固辭陳畏懼之道帝乃止前後賞賜不可勝計及卒帝爲廢朝令左衛大將軍元旻監護喪事賻絹三千疋上謂侍臣曰吾每欲致榮定於三事其人固讓不可今欲贈之重違其志於是贈龔州刺史陳國公謚曰懿

令狐虬早以名德著聞仕歷瓜州司馬墩煌郡守郢州刺史西魏文帝大統末卒於家帝傷悼之遣使者監護喪事又勅鄉人爲營墳壟贈龍驤將軍瓜州刺

史

武帝初河東安邑人紆回性至孝武成中父母喪廬於墓側負土成墳廬前生麻一株高丈許圍之合拱枝葉鬱茂冬夏嘗青烏棲其上圓舉聲哭烏卽悲鳴時人異之帝表其閭擢授其棠令慕容三藏爲右衛將軍周師入鄴齊後主失守東遁委三藏等留守鄴宮齊之王公以下皆降三藏猶率麾下抗拒周師及齊平帝引見禮甚厚詔曰三藏父子誠節人聞宜加榮秩授開府儀同大將軍建德元年晉公護誅詔曰故使持節柱國大將軍大都督陽平郡開國公李遠早蒙驅任夙著勲績內參

帷幄外屬藩維竭誠王室乃罹橫禍言念貞良追增傷悼宜加榮寵用彰忠節贈本官加陝州等十五州諸軍事陝州刺史謚曰忠遠初爲晉公護所害也六年詔曰僞齊之末奸佞擅權濫罪淫刑動挂羅網僞右丞相咸陽王故斛律明月僞侍中特進開府故崔季舒等七人或功高獲罪或直言見誅朕兵以義動剪除凶暴表閭封墓事切下車宜追贈謚并加其見在子孫各隨蔭叙錄家口田宅沒官者並還之秦族性至孝母沒哭泣無時唯飲水食菜而已終喪之後猶蔬食不入室房二十許年鄉里咸歎異之其

邑人王元達等七十餘人上狀有詔表其門閭
張元字孝始祖父成沒元號踴絕而後蘇後其父延
雋卒水漿不入口三日鄉里歎異之縣博士楊軌等
二百餘人上其狀有詔表其門閭
皇甫暹河東汾陰人遭母喪廬於墓側負土爲墳郡
縣表上其狀有詔旌異之
隋文帝開皇初詔曰昔漢高欽無忌之義魏武梟子
幹之風前代名賢後王斯重魏故度支尚書美陽伯
蘇綽文雅政事遺跡可稱展力前王垂聲著績宜開
土宇用旌善人於是追封郢國公邑三千戶

宇文孝伯以忠諫爲周宣帝所殺及帝踐極以孝伯
及王軌忠而獲罪並令收葬復其官爵又嘗謂高頴
曰宇文孝伯實有周之良臣若使此人在朝我輩無
措手處也

紆士雄回之子也少質直孝友父喪廬於墓側負土
成墳其庭前有一槐樹先甚鬱茂及士雄居喪樹遂
枯死服闋還宅死槐復榮帝聞之歎其父子至孝詔
書褒揚號其所居爲累德里

郎方貴淮南人也少有志尚與從父弟雙貫同居開
皇中方貴嘗因行出遇雨淮水汎長於津所寄渡船人

怒之槌方貴臂折至家其弟雙貴驚問所繇方貴具言之雙貴恚遂伺津毆擊船人致死守津者執送之縣官案問其狀以方貴爲首當死雙貴從坐當流兄弟二人爭爲坐首縣司不能斷送詣州兄弟各引咎州不能定二人爭欲赴水而死州狀以聞而異之特原其罪表其門閭賜物百段

田德懋觀國公仁恭之子也少以孝友著名開皇初以父軍功賜爵平原郡公授太子千牛備身丁父艱哀毀骨立廬於墓側負土成墳高祖聞而嘉之遣員外散騎侍郎元志就弔焉復降璽書曰皇帝謝田德

懋知在窮疾哀毀過禮倚廬墓所負土成墳朕孝理天下思弘名教復以爾通家情義素重有聞孝感嘉歎兼深春日暄和氣力何似宜自抑割以禮自存也兼賜練二百匹米百石後下詔表其門閭

杜猷爲濟陰太守開皇三年死王事詔曰行仁蹈義名教所先厲俗敦風宜見褒獎往者山東河表經此叛亂孤城遠守多不自全濟陰太守杜猷身陷賊徒命懸寇手郡省事范臺攻傾產營護免其戮辱眷言誠節實有可嘉宜超嘗賞用明激勸臺攻可大都督假湘州刺史

薛濬開皇中為考功侍郎丁母艱不勝喪病卒有司以聞帝為之屑涕降使齋冊書弔祭曰皇帝咨故考功侍郎薛濬於戲惟爾操履貞和器業詳敏允膺列宿勤蹇克彰及遭私艱奄從毀滅嘉爾誠孝感於朕懷奠酌有加抑惟朝典故遣使人指申往命魂而有靈歆茲榮渥嗚呼哀哉

楊慶字伯悅年二十五郡察孝廉以侍養不行其母有疾不解襟帶者七旬及居憂哀毀骨立負土成墳齊世表其門閭賜帛三十疋綿十屯粟五十石高祖開皇中屢加褒賞

郭儔字引文太原文水人也家閭雍睦七葉共居犬豕同乳鳥鵲通巢時人以為義感之應州縣上其事高祖遣平昌公宇文弼詣其家勞問之侍書御史柳或巡省河北表其門閭

劉方為驩州都督平林邑國紀功而還方在道遇患而卒帝甚傷惜之乃下詔曰方肅承廟筭恭行天討飲水遙遙視險若夷摧鋒直指出其不意鯨鯢殄殪巢穴咸傾役不再勞肅清海外致身王事成績可嘉再贈上柱國盧國公

煬帝大業二年五月乙卯詔曰旌表先哲式在饗祀

所以優禮賢能顯彰遺愛朕永鑒前脩尚想名德何嘗不興歎九原屬慙千載其自古以來賢人君子有能樹聲立德佐世救時傳利殊功有益於人者並宜營立祠宇以時致祭墳壟之時不得侵踐有司量爲條式稱朕意焉

三年四月己亥次赤岸驛以太牢祭故太師李穆
五年二月戊戌次于閩鄉詔祭開皇功臣墓三月庚午有司言武功男子史永遵與從父昆弟同居帝嘉之賜物一百段米二百石表其門閭

陶模爲嵐州司馬漢王諒據并州反刺史喬鍾喬葵

發兵赴逆模諫之鍾葵失色曰司馬反邪臨之以兵辭氣不撓鍾葵義而釋之軍吏進曰若不斬模何以壓衆心於是囚之於獄悉掠取資財分賜黨與及諒平帝嘉之拜開府授大興令

皇甫誕爲漢王諒并州司馬諒反誕諫之爲諒所囚及楊素至諒屯清源誕出獄謀閉城拒之又爲諒所害煬帝以誕亡身殉國嘉悼者久之下詔曰褒顯名節有國通規加等飾脩抑惟令典并州總管司馬皇甫誕性理淹通志懷審正劾官贊務聲績克宣值狂悖稱禍凶威孔熾確殉單誠不從妖逆雖幽執寇手

而雅志彌厲遂潛與義徒據城抗節衆寡不敵奄致非命可贈柱國封弘義公謚曰明

華秋汲郡臨河人也事母以孝聞母終廬於墓側大業初調狐皮郡縣大獵有一兔人逐之奔入秋廬中匿秋膝下獵人至廬所異之自爾此兔嘗宿廬中馴其左右郡縣嘉其孝感具以狀聞帝降使勞問表其門閭

翟普林楚丘人也性至孝事親以孝聞州郡辟命皆固辭不就躬耕色養鄉鄰謂為楚丘先生後父母疾親易燥濕不解衣者七旬大業初父母俱終衰毀殆

將滅性廬於墓側負土成墳盛冬不衣繒絮唯單縗而已家有一烏犬隨其在墓若普林哀臨犬亦悲號見者嗟異焉有二鵲巢其廬前樹每入其廬馴狎無所驚懼大業中司隸巡察奏其孝感擢授孝陽令游元大業中為侍御史奉使黎陽楊玄感作亂元數其罪玄感怒而囚之屢脅以兵竟不屈節於是害之帝甚加歎贈銀青光祿大夫賜縑五百疋拜其子仁宗為正議大夫弋陽郡通守

松贊大業末為石門府椽正賊帥楊厚執之令告北海縣云郡兵已被宜早歸降贊至城下言賊弱不足

唐高祖武德元年八月以高穎賀若弼張衡宇文弼
薛道衡董純等忠於前朝李金才李敏見忌隋室皆
被煬帝所誅於是贈其官爵

裴仁基初仕隋爲左光祿大夫陷於王世充後謀歸
國事洩遇害武德中贈原州都督謚曰忠

二年五月詔曰民稟五常仁義斯重士有百行孝敬
爲先自古哲王經邦致治設教垂範莫尚於茲叔世

澆訛民多僞薄脩身克己事資誘勸朕恭膺靈命臨
馭遐荒愍茲弊俗方思遷道雍州萬年縣樂遊鄉民
王世貴孝性自天力行無怠喪其所怙哀毀絕倫負
土成墳結廬墓側鹽酪之味在口不嘗哭泣之聲感
於行路安福鄉民宋興貴立操雍和主情友睦同居
合爨累世積年務本力農崇謙履順弘長名教敦厲
風俗宜加褒顯以勸將來可並旌表門閭蠲免課役
布告天下使明知之

四年表南豐州漢陽縣令姜世雄之閭褒義門也世
雄立性仁厚夙敦教義私門之內友悌著聞累葉共

君合宗同爨鄉黨稱慕曾無間言屬隋末寇盜經其里者皆感其義節不忍侵掠帝聞而嘉尚言其孝行堪勵風俗下詔褒美課役並從蠲免

楊太寶武德初為龍門令劉武周陷晉絳攻之不降城破被害褒贈全節侯

劉感岐州鳳泉人後魏司徒高昌王豐生之孫也武德初以驃騎將軍鎮涇州薛仁果率衆圍之感嬰城拒守城中糧盡遂殺所乘馬以分將士將士感之一無所噉唯煮馬骨取汁和木屑食之城垂陷者數以長平王叔良援兵至仁果解圍而去感與叔良出戰

為賊所擒仁果復圍涇州令感語城中云援軍已敗徒守孤城何益也宜早出降以全家室感及至城下大呼曰逆賊饑餓亡在朝夕秦王率數十萬衆四面俱集城中勿憂宜各自勉以全忠節仁果大怒執感於城邊埋脚馳騎射殺之至死聲色愈厲賊平帝購得其屍祭以少牢贈瀛州刺史封平原邵公謚曰忠壯令其子襲官爵并賜田宅

嘗達陝人也初仕隋為鷹擊郎將數從帝征伐甚蒙親待及義兵起達在霍邑從宋老生來拒戰老生敗達懼自匿不出高祖謂達已死令人閤屍求之及達

來見高祖大悅以爲統軍武德初拜隴州刺史時薛舉屢攻之不能克乃遣其將件士政以數百人僞降達達不之察厚加撫接士政伺隙以其徒劫達擁城中二千人而叛牽達以見於舉達詞色抗厲不爲之屈舉指其妻謂達曰識皇后不達曰止是癯老嫗何足可識竟釋之有奴賊帥張貴謂達曰汝識我不達曰汝逃死奴瞑目視之貴怒持刀將斧達人救獲免及仁杲平帝見達謂曰卿之忠節便可求之古人命起居舍人令狐德棻曰劉感嘗達須載之史策也執件士政撲殺之賜達布帛三百段復拜隴州刺史

魏衡妻王氏梓州郫人也武德初薛仁杲舊將旁企地侵掠梁部因獲王氏逼而妻之後企地漸強盛衡謀以城應賊企地領衆將趨梁州未至數十里飲酒醉卧王氏取其佩刀斬之携其首入城衆乃散帝大悅封爲崇義夫人仍赦衡同賊之罪

獨孤武都謀叛王世充歸國事覺誅死武都子師仁年始三歲世充以其年幼不殺使禁掌之乳母王氏號蘭英請髡鉗求入保養世充許之蘭英撫育提携備盡勛力時喪亂年饑人多餓死蘭英扶路乞丐捃拾遇有所得便歸與師仁蘭英唯啖土飲水而已後

許採拾乃竊師仁歸於京師帝嘉其義下詔曰師仁乳母王氏慈惠有聞撫鞠無倦提携遺幼背逆歸朝宜有褒隆以賜其號可封永壽鄉君

張善相許州襄城人也大業末爲里長每督縣兵逐小盜爲衆所附遂據本縣歸于李密密敗以城歸國帝授伊州總管王世充數攻之善相頻遣使請救兵既不赴城中糧盡自知必敗謂寮屬曰吾荷國恩要當効命諸君無爲同死當斬吾頭以歸世充衆皆泣曰寧與公同死終不獨生後城陷被禽送於世充所辭色不撓罵世充極口尋被害帝歎曰吾負善相善

負吾封其子爲襄城郡公

張志寬河東安邑人也武德八年丁母憂廬於墓側負土成墳有烏巢于廬前樹上志寬哭臨烏輒悲鳴帝聞之遣使就第吊授員外散騎嘗侍賜物三百段表其門閭

太宗貞觀元年勅召臨淮劉子翼入京辭以繼母年老不赴色養之美鄉里稱焉江南道大使李襲譽奏旌表之仍賜以米布改所居爲孝慈里及母卒摧毀傷感行路

二年九月涇陽人田伯明高陵寡婦李氏各賜帛三

九州元善 旌表二
十疋旌孝義也

六年正月蠲布衣邊鳳舉常引宗崔定仁陳嗣等四家課役褒孝義也鳳舉渤海人引宗邑西人並以至孝聞於鄉黨葬父母皆廬墓次負土成墳鳳舉植栢而爲嘉樹引宗廬前生芝草七十餘莖見者以爲孝感丁父母憂縗服齋居二十餘年不釋定仁博陵人爲偶像晨昏定省若平生焉隋末群賊蜂起莫有侵掠者嗣隴西人四葉同居稱爲豈睦帝異之並下書褒美

七年十一月以少牢祭杜如晦杜淹李綱之墓

十二年二月帝幸長春宮表王隴德之間褒節義也隴德本馮翊人王藏仁之蒼頭也藏仁父母先歿未獲合葬既而從役物故其妻孀居旁無親屬隴德迎致其屍并其父母而葬之因廬其墓次負土成墳每有白雉悲鳴於墳上焉

十月表通事舍人薛萬備之闕旌孝行也萬備者營州都督萬淑之季弟也初丁母艱截髮爲髦以充歛及葬廬於墓次負土成墳帝聞而嘉之降璽書弔慰焉

十五年二月表華州鄭人王瞿曇之間旌孝行也瞿

曇事親以孝養聞閭里稱其敬讓葬祖父母及伯父皆負土成墳三年乃畢母終亦如之晝夜悲號哀感行路頭髮盡落形體枯悴墓門三年不掩夜嘗寢於棺側服終之後仍不離墓焉

十一月壬戌賜孝女夏侯碎金布帛二十段粟十石仍標其門閭碎金滑州胙城人先適河間劉氏已產一女其父因疾喪身碎金遂求離其夫以終侍養夫不違其志分留一女碎金供養其父兼事後母以孝聞鄉里方之曾閔父亡號哭之聲朝夕不絕哀毀之至殆不勝喪寒不衣絮被髮徒跣負土成墳廬於墓

側至是已歷五年日一食而止

十七年齊王祐舉兵祐初遣沓君驎將數百騎擊平陵平陵人拒守獲全詔嘉之改平陵爲全節縣十九年二月庚戌輿駕發雒陽丁巳詔曰昔望諸列國之相漢主尚求其後夷吾霸者之臣魏君猶禮其墓况正直之道邁青松而孤絕忠勇之操掩白玉而振彩者哉殷故少師比干貞一表德鄰幾成性以明允之量屬無妄之辰玉馬遽馳愍其邦之殄悴寶衣將燎惜其君之覆亡其義不回懷忠蹈節謹言纒發輕百齡之命濫刑旣逞碎七尺之軀雖復周王封墓

莫救焚園之禍孔聖稱仁寧追剖心之痛朕自趙魏
問罪遼碣經途秀麥之墟緬懷梓林之地駐蹕而瞻
荒隴願以為臣撫躬而想幽泉思聞其諫豈可使慎
終之義又關於往册易名之典無聞於後代宜錫寵
命以展宿心可追贈太師謚曰忠烈所司崇其墓而
葺祠堂州縣春秋二時祀以少牢給隨近五戶以供
灑掃帝自為祭文

壬戌次安陽遣使以少牢祭齊清河王高岳之墓

是年帝征遼攻安市城不剋其城中皆屏聲偃幟城
主升城拜手奉辭太宗嘉其堅守賜絹百疋以勵事

君之節

又遼東城長史為部下所殺而省事

省事郡吏也

携其妻

子奔白巖城降帝義之賜省事帛五疋仍為造靈輿
歸平壤

二十一年二月甲戌賜滑州胙城女子劉少娘粟帛
仍表其閭旌孝行也少娘母夏侯粹金亦以至孝聞
少娘年十五而母亡遂廬於墓側負土成墳

許垣豫州人也年十歲父入山採藥為猛獸所噬即
號叫以杖擊之獸遂奔走父得以全帝聞而謂侍臣
曰垣雖幼童遂能致命救親至孝自衷深可嘉尚授

文林郎賜物五十段

堯君素隋大業末爲鷹揚郎將鎮河中義兵起固守不下高祖遣其妻至城下說令降君素引弓射殺後人心離叛左右斬之傳首京師梟於都市後帝幸河中歎其忠於隋室贈蒲州刺史以勵事君

楊三安妻李氏雍州涇陽人也事舅姑以孝聞及舅姑下沒三安亦死二子孩童家貧寡李晝則力田夜則紡績數年間畢舅姑及夫之叔姪兄弟七喪深爲遠近所嗟尚帝聞而異之賜帛二百段遣州縣存恤孝女衛氏字無忌絳州夏縣人也初其父爲鄉人衛

長則所殺無忌時年六歲母又改嫁更無兄弟及長嘗思復讎無忌從伯嘗設宴爲樂長則時亦預坐無忌以塼擊殺之旣而詣吏稱父讐旣報請就刑戮巡察大使黃門侍郎褚遂良以聞帝嘉其孝烈特令免罪給傳乘徙於雍州并給田宅仍令州縣以禮嫁之王少玄者博州聊城人也父隋末於郡西爲亂兵所害少玄遺腹生年十餘歲問父所在其母告之因哀泣便欲求屍以葬時白骨蔽野無繇可辨或日以子血霑父骨即滲入焉少玄乃刺其體以試之凡經旬日竟獲父骨以葬盡體病創歷年方愈貞觀中本州

聞薦拜除王府參軍

阿史那杜爾本突厥處羅可汗第二子貞觀中爲行軍總管以高昌凱旋帝謂杜爾曰諸軍並分外求財爾獨能不取深可尚也高昌有一寶鈿刀是其國所寶即以賜之并雜綵千段

李乾祐爲侍御史母卒廬於墓側負土成墳帝遣使就吊仍旌表其門

高宗永徽三年九月以周司沐大夫裴融尚書左丞封孝琰有忠節於前代制擢其子孫以旌介烈

五年二月庚申故雒州都督贈尚書左僕射唐突通

故吏部尚書贈陝東道大行臺尚書右僕射殷開山並贈司空故澤州刺史贈荊州都督邳國公長孫順德贈開府儀同三司故左領軍大將軍竇琮贈特進故右武衛大將軍史大柰贈輔國大將軍故禮部尚書溫大雅贈尚書右僕射故太僕卿贈兵部尚書權引壽贈太子少師故洪州都督贈戶部尚書劉政會故荊州都督贈禮部尚書應國公武士護並贈并州都督故襄州都督贈左驍衛大將軍張公謹贈荊州都督故資州刺史李高遷贈涼州都督故嘉州刺史李思行贈洪州都督故右光祿大夫張平高贈潭州

都督並追錄武德功臣也

六年正月親謁昭陵詔貞觀以來勲賢大臣陪葬者宜以少牢於墓致祭其子孫有淪屈者所司奏聞

三月丁酉遣北部員外李文禮致祭名臣圖形於凌煙閣者凡七人故太子太師魏徵右僕射高士廉特進蕭瑀輔國大將軍段志玄夔國公劉弘基徐州都督秦叔寶秘書監虞世南皆始終著名者也

四月丙寅鎮軍大將軍阿史那杜爾卒贈并州都督陪葬昭陵謚曰元仍令起冢象葱山以旌平龜茲之功也

顯慶元年八月賜相州司兵參軍武弘度宋州人程表師粟帛標其門閭旌孝行也

二年二月高宗在雒陽宮遣使祭伊尹周公伯夷叔齊許由等廟十月車駕幸許州次白善頓遣有司祭鄭子產及漢太丘長陳實之墓

五年二月車駕幸并州其義旗初職事五品已上身亡沒墳墓在州者令所司致祭

麟德元年十月己卯詔曰周京兆尹少冢宰廣陵郡守宇文孝伯忠亮基心貞堅表志滯刑旣逞方納諫而求人忍忌將加其指軀而徇節年紀雖永風烈猶

生宜峻徽章式旌華胄其孫左威衛長史思純可朝散大夫

二年十月命有司致祭伊尹周公桓榮楊彪杜預等墓及祠廟

十一月己卯至榮陽祭紀信墓追贈驃騎大將軍

三年有事泰山路過鄆州聞壽張人張公藝九世同

居帝親幸其宅問其義繇其人請紙筆但書百餘忍

字帝為之流涕賜以纁帛焉初北齊安王高樂詣宅慰撫旌表隋開皇中大

夫卻陽公梁子恭親慰撫重表其門貞觀中特勅更加旌表

咸亨三年十月丁亥詔脩葺傳說祠廟仍令所司少

牢致祭

儀鳳二年吐蕃寇扶州之臨河鎮鎮將杜孝昇為賊

所執賊令送書松州以邀其降孝昇身遭六鎗竟不

從俄而賊衆捨孝昇而退又率餘衆拒守詔贈孝昇

游擊將軍以旌其忠烈仍賜物二百段孝昇俄以創

甚去職詔令給祿終身

三年九月詔賜雍州司法參軍楊譔故妻常氏物百

段旌孝行也常氏鄜州刺史吉甫之女其父初嬰疾

疾累月不解衣而寢及父卒一慟而絕帝嘉其至行

特賜纁帛仍令編入國史

永隆二年四月贈故吉州長史陳行焉陸州刺史旌忠節也初行焉使吐蕃吐蕃大臣欽陵使行焉拜伏行焉擁節不屈臨之以兵竟不從因被拘留十餘年而卒至是喪還帝深嘉歎之故贈官焉

永淳二年正月車駕發東遣使祭巢父許由等祠廟五月以雍州人元讓為太子右內率府長史旌孝行也讓弱冠明經擢第以母疾遂不求仕躬親藥膳蒸蒸致養不出閭里十餘年及母終廬於墓側蓬髮不櫛沐菜食飲水而已咸亨中孝敬監國下令表其門間至是巡察使奏讓孝悌殊異繇是拜職

孝女賈氏濮州鄆城人也年始十五其父為宗人玄基所害其弟疆仁年幼賈氏撫育之誓以不嫁及疆仁成童思共報復乃候玄基殺之取其心肝以祭父墓遣疆仁自列於縣司斷以極刑賈氏詣闕自陳已為請代疆仁死帝哀之特下制賈氏及疆仁免罪移其家於雒陽

東夷都護張儉第二女左千牛敏直之妻性至孝數歲時父母微有病急即觀察顏色晝夜不離左右初聞儉有疾自傷不獲奔赴期於必死及凶問至號咷一慟而絕帝聞之下詔褒美贈物一百段仍令緝入

國史

楊紹宗妻王氏華州華陰人也初年二歲所生母亡
爲繼母鞠養至年十五父又征遼而歿繼母尋亦卒
王乃收所生及繼母屍柩并立父形像招魂遷葬訖
廬於墓側培其祖及父母墳永徽中詔曰故楊紹宗
妻王氏因心爲孝率性成道年迫桑榆勛力衰謝以
往在隋朝父歿遼左招魂遷葬負土成墳又葬其祖
父母等竭此老年親加板築痛結晨昏哀感行路永
言志行嘉尚良深宜標其門閭用旌敏德賜物三十
段粟五十石

蘇定方爲左武衛大將軍卒帝傷惜久之謂侍臣曰
蘇定方於國有功例合褒贈卿寧不言遂使哀榮未
及興言及此不覺嗟悼遽下詔贈幽州都督謚曰莊

